

CUSSEGL GROND

Sessiun da december 2022

Incumbensa da la Cumissiun per sanadad e fatgs socials (CSF) concernent l'examinaziun da las contribuziuns dal chantun e da las vischnancas als ospitals publics per prestaziuns d'utilitad publica (emprim sutsegnader Loepfe)

La Lescha per promover la tgira da persunas malsaunas (LTM, DG 506.000) regla las contribuziuns dal chantun e da las vischnancas als ospitals acutomatics e psichiatrici publics (art. 19 al. 1 lit. e ed f). Sco prestaziuns d'utilitad publica valan lasuenter prestaziuns da basa fixas, tgira palliativa, prevenziun, servetsch social, pastoraziun en l'ospital, prevenziun d'epidemias, medischina legala, gestiun d'in ospital protegì, provediment medicinal per situaziuns d'urgenza e per catastrofes sco er per prestaziuns obligatoricas tenor l'artitgel 13 alinea 2, uschenavant che las tariffas na cuvran betg ils custs da gestiun e d'investiziun (art. 24 al. 2). En il preventiv fixescha il Cussegl grond mintga onn definitivamain il credit total per la cumpart dal chantun da las contribuziuns chantunalas e communalas als ospitals publics per las prestaziuns d'utilitad publica (art. 21 al. 1 lit. c).

Ils credits annuals tenor preventiv per contribuziuns chantunalas ad ospitals publics per prestaziuns d'utilitad publica (nr. da conto 3212.363412) han importà

Quint 2017	21 859 974 francs
Quint 2018	21 870 780 francs
Quint 2019	21 877 587 francs
Quint 2020	21 877 587 francs
Quint 2021	27 792 846 francs
Preventiv 2022	21 900 000 francs
Preventiv 2023	25 285 000 francs
PF 2024–2026	25 285 000 francs per onn

Las contribuziuns èn en general restadas constantas en il decurs dals onns, quai cun excepziun da l'onn 2021 pervia dal coronavirus. L'augment a partir da l'onn 2023 pertutga dus letgs da tgira intensiva supplementars e l'infecziologia en l'Ospital chantunal dal Grischun sco er la psichiatria d'uffants e da giuvenils en ils SPGR (preventiv 2023, pagina 220, commentari nr. 2).

A chaschun da la debatta dal Cussegl grond davart la dumonda Niggli (Samedan) concernent la garanzia dal provediment da sanadad decentral a lunga vista en il Grischun en la sessiun da zercladur da quest onn (protocol dal Cussegl grond dals 16 da zercladur 2022, pagina 1331) ha CG Peyer explitgà areguard la dumonda da las prestaziuns d'utilitad publica il suandant: «Impurtantas èn er las prestaziuns d'utilitad publica ... Sche Vus inoltrais qua anc la dumonda u faschais in'ultima intervenziun e schais, ch'ins duaja dublegiar u triplar questas prestaziuns, alura As suttascriv jau quai anc oz ... Nus giain in zic en ina direzziun sur las prestaziuns d'utilitad publica che jau augmentass anc uschè gugent, sche Vus ma concedissas il preventiv necessari.»

La Cumissiun per sanadad e fatgs socials (CSF) è da l'avis, che questas remartgas dal cusseglier guvernativ espriman in malesser derasà davart l'autozza da las contribuziuns a las prestaziuns d'utilitad publica. Tenor l'avis da la cumissiun manca dentant ina basa per dumandar in augment dal credit global en il rom dal process da budgetaziun.

La Cumissiun per sanadad e fatgs socials CSF incumbensescha la Regenza,

1. da laschar examinar l'autozza da las contribuziuns dal chantun e da las vischnancas als ospitals publics per prestaziuns d'utilitad publica pertutgant lur commensurabladad. L'examinaziun duai er cuntegnair recumandaziuns d'agir a la Regenza ed al Cussegl grond;
2. d'integrar las eventualas recumandaziuns d'agir en sia proposta per il credit tenor preventiv da l'onn 2024 per contribuziuns chantunalas ad ospitals publics per prestaziuns d'utilitad publica (nr. da conto 3212.363412).

Cuira, ils 7 da december 2022

Loepfe, Holzinger-Loretz, Degiacomi, Collenberg, Natter, Rüegg, Rutishauser, von Ballmoos, Zanetti (Sent)